

## PAGTULON-AN 4 - ANG DAKUNG LUNOP SA DALAN SA KINABUHI

### Genesis 6-8

**TEMA:** Sa pagpakita sa kasigurohan sa mga magtotoo diha kang Cristo.

Nakasinati ka na ba ug lunop? Ang lunop mahimong muabut pinaagi sa kusog kaayo nga ulan, bagyo, tsunami, pagkaguba sa dam, ug uban pa. Kon makadungog kita ug lunop, nahibalo kita nga usa kana ka panahon sa kalisud nga antuson sa mga tawo. Niining atong pagtulon-an karon moadto kita sa dakung lunop diha sa *DALAN SA KINABUHI*.

Human si Enoc gilalin, ang mga tawo misamot sa pagkadautan. Si Satanas nagakugi pag-ayo sa pagdala sa mga tawo sa iyang dalan ug naningkamot nga dili gayud ang Dios makatuman sa pagpadala sa Manunubos nga Iyang gisaad sa Genesis 3:15. Ug nagapadayon ang pagkadautan sa mga tawo. Ang Dios mipahayag, “Pagalaglagon ko gikan sa nawong sa yuta ang tawo nga akong gibuhat...” Genesis 6:7.

Ang Bibliya nagaingon, nga bisan pa taliwala sa mga kasal-anan adunay usa ka tawo nga naglakaw kauban sa Dios. Ang ngalan sa maong tawo mao si Noe. Siya nagalakaw sa dalan sa pagtoo ug nakakaplag ug kahimuot sa panan-aw sa Dios, Genesis 6:8. Si Noe usa ka tawong matarung ug ang Dios misugo kaniya sa pagbuhat ug arka nga usa ka daku nga barko.

Ang Dios miingon, “Magbuhat ka ug usa ka arka sa kahoy nga “gopher”; magbuhat ka ug mga kuwarto sulod sa arka, ug pagabuliton mo ug salong ang sulod ug gawas. Ug buhaton mo kini sa ingon niini nga paagi: ang katas-on sa arka tutulo ka gatus (300) ka maniko; ang iyang kalapdon kalim-an (50) ka maniko; ug ang iyang kahabugon, katloan (30) ka maniko. Magbuhat ka ug usa ka gawang sa arka ug humanon mo kini sa usa ka maniko ang kahabugon ngadto sa ibabaw; ug ibutang mo sa luyo ang pultahan sa arka, ug buhatan mo ug tulo (3) ka hunta-hunta, nga may salug sa ilalum sa ika duha (2) ug ika tulong (3) hunta. Ug ako, ania karon, ako magdala ug lunop sa mga tubig ibabaw sa yuta aron sa paglaglag sa tanan nga unod nga may gininhawa sa kinabuhi gikan sa ilalum sa langit; ang tanan nga anaa sa yuta mangamatay.” Genesis 6:14-17.

Atong isipon nga ang usa (1) ka maniko napulog-walo (18) ka pulgada, busa ang arka upat ka gatus ug singkuwenta (450) ka tiil (137.16 m.) kataas-on, syetenta y singko (75) ka tiil (22.86 m.) ang kalapdon; ug kwarantay singko (45) ka tiil (13.72m.) ang kahabugon. Timan-i nga mao kini ang kataas sa tabernakulo nga gipilo-pilo ka tulo (3), ang kalapdon sa tabernakulo ug ka tulo (3) usab gipilo-pilo ang kahabugon. Si Noe mituman sa sugo Dios bisan wala pa siya nakakita sa ulan o lunop. Sumala sa Genesis 2:6, yamog lamang ang gigamit sa

Dios pagpatubig sa yuta hangtud sa maong panahon. Karon si Noe misugod sa paghimo sa arka ug nagapasidaan sa mga tawo sa paghukom sa Dios, 2 Pedro 2:5.

Sa dihang nahuman na ang arka ang Dios misulti kang Noe, “Sumulod ka sa arka, kay *ikaw ra* ug ang imong panimalay, akong nakita *nga matarung* sa atubangan Ko.” Ug gisiradohan sila sa Dios didto sa sulod sa arka, Genesis 7:1-16. Ug ang pultahan gisirado, diin si Noe ug ang iyang pamilya luwas sulod sa arka. Ug miabut ang dakung lunop, Genesis 7:17-24. Ang Dios wala makalimut ni Noe, Genesis 8:1-14.

Ang tanang naa sa gawas sa arka nalaglag, kadto lamang tua sa sulod sa arka ang luwas. Ang arka milutaw nga walay kaudat ibabaw sa mga tubig sa lunop. Ug ang ulan nagapadayon sulod sakwarenta (40) ka adlaw ug kwarenta (40) ka gabii apan ang arka luwas sa gihapon.



Tinubdan: Sweet Publishing – kini ilustrasyon lamang sa Genesis 8:6-7

Sa hapit na ang usa katug, human ang Dios miingon, “Sumulod ka sa arka,” karon miingon Siya, “Kumawas ka sa arka,” Genesis 8:16. Unsa man ang gibuhat ni Noe sa dihang mikawas sila sa arka didto sa mamala nga yuta? Si Noe nagbuhat ug halaran ug misimba sa

Dios, Genesis 8:20. Niining maong panahon, ang Dios mihimo sa balangaw ingon nga timaan nga dili na Niya laglagon pag-usab ang yuta pinaagi sa lunop, Genesis 9:9-17. Daghan ang mga lunop nagakahitabo sa kalibutan karon, apan dili na gayud itugot sa Dios nga palunopan pa Niya ang tibuok kalibutan aron sa paglaglag niini sama sa Iyang gibuhad sa panahon ni Noe.

Si Noe ug ang arka nagapakita kanato sa espirituanong kahulogan sa KALUWASAN UG PAGKALAGLAG:

1. Kon si Noe naa pa sa gawas sa arka, malaglag gayud siya. Apan sa sulod sa arka siya luwas uban sa iyang pamilya.
2. Ang arka binuhad sa kahoy nga “gopher” ug gibulit sa salong aron kini maselyohan. Ang salong mao ang nagpugong nga ang tubig dili makasulod sa arka ug naghimo kang Noe nga luwas. Usa ka nindot nga hulagway sa atong Ginoong Jesu-Cristo.
3. Ang mga kahoy naghatag ug kinabuhi aron mahimo ang arka. Si Cristo mihatag sa Iyang lawas pinaagi sa kamatayon, aron kita maluwas gikan sa hukom sa atong mga sala.
4. Adunay usa lamang ka pultahan sa arka ug ang tanan kinahanglan moagi sa usa lang ka pultahan aron maluwas. Ingon ana usab sa atong panahon karon. Adunay kinabuhing walay katapusan diha sa pagpakaila kang Jesu-Cristo, ingon nga ilang kaugalingon Manunubos gikan sa walay katapusang kamatayon.
5. Maingon man nga si Noe may pagtoo sa Pulong sa Dios ug mibuhat sa arka; kita usab karon kinahanglan motoo sa Pulong sa Dios ug mosalig sa kamatayon, paglubong ug pagkabanhaw ni Jesu-Cristo, aron maluwas kita gikan sa paghukom sa Dios.

Atong natun-an nga ang dakung lunop milaglag sa tanang mga tawo nga dili matarung. Ang Bibliya nagatug-an, nga adunay laing paghukom nga muabut sa kalibutan. Luwas ka ba diha kang Cristo karon? Si Jesu-Cristo nagahangyo kanimo nga mosalig ka Kaniya, ug Siya magaluwas kanimo. Siya nahigugma kanimo ug nagpakamatay Siya alang sa imong mga sala.

Si Jesu-Cristo mao ang atong arka karon ug Siya usab ang pultahan. Siya miingon, “Ako mao ang pultahan, kon dunay mosulod agi kanako, siya maluwas,” Juan 10:9. Mosalig ka ba Kaniya, karon ingon nga imong Manluluwas gikan sa silot sa sala?

**SAG-ULOHON NGA BERSIKULO: “Ako mao ang pultahan, kon dunay mosulod agi Kanako, siya maluwas, ug siya mosulod ug mugawas ug makakaplag siyag masibsib.” Juan 10:9.**

## PAGTULON-AN 4 – BULOHATON

Direksyon: Isulat ang hustong tubag sa mga pamahayag o pangutana.

1. Nakita sa Dios nga ang \_\_\_\_\_ sa tawo daku. Genesis 6:5.
2. Ang Dios miingon, “Akong \_\_\_\_\_ nga akong gibuhad.” Genesis 6:7.
3. Apan si Noe nakakaplag \_\_\_\_\_ sa panan-aw sa Dios. Genesis 6:8.
4. Si Noe usa ka \_\_\_\_\_ nga tawo, \_\_\_\_\_ sa iyang panahon. Genesis 6:9.
5. Ang Dios misulti kang Noe sa pagbuhat ug \_\_\_\_\_ sa kahoy nga “gopher”. Genesis 6:14.
6. Ang Dios misulti kang Noe sa pagdala sa mga mahinlo nga mananap \_\_\_\_\_ sa iyang matang, ug sa dili mahinlo nga mananap sa \_\_\_\_\_ sa iyang matang, laki ug baye. Genesis 7:2-3.
7. Sa dihang si Noe ug ang iyang pamilya naa na sa arka, ang Ginoo \_\_\_\_\_. Genesis 7:16.
8. Human sa dakung lunop si Noe nagbuhat ug \_\_\_\_\_ ug naghalad \_\_\_\_\_. Genesis 8:20.
9. Ang paghukom alang sa sala umaabut sa kalibutan, apan dili kita angayan mahadlok kon ang atong kinabuhi \_\_\_\_\_. Colosas 3:3.
10. Ang arka aduna lamay usa (1) ka pultahan diin si Noe ug ang iyang pamilya misulod alang sa ilang kaluwasan. Aduna usab usa (1) ka pultahan karon diin kita mosulod aron maluwas kita sa hukom sa Dios. Ug ang Ginoong Jesu-Cristo mao lamang ang pultahan.

Paghimo ug usa ka hulagway sa arka diha sa iyang saktong sukod ug isulat ang Juan 10:9 sa tapad niini.